

**ՄՏԵՆԱՅՆ ՀԱՅՈՑ ԳԱՐԵԳԻՆ Ա ԿԱԹՈՂԻԿՈՍԻ
ՌԻՂԵՐՉԸ «ՀԱՎԱՏՔ ԵՎ ԺԱՌԱՆԳՈՒԹՅՈՒՆ»
ՇԱՐԺՄԱՆ ՄԱՍՆԱԿԻՑՆԵՐԻՆ**

Մայիսի 1-2-ը Հայաստանի և Արցախի ողջ տարածքում շուրջ 17 հազար պատանիներ մասնակցեցին Հայաստանում քրիստոնեությունը պետական կրոն հռչակման 1700-ամյակին նվիրված «Հավատք և ժառանգություն» շարժմանը: Այդ օրերին շարժման մասնակիցները՝ 14-18 տարեկան պատանիներ ու աղջիկներ, ավելի քան 80 վանքերի և արգելոցների տարածքներում իրականացրեցին քարեզարդման աշխատանքներ:

Գեղեցիկ միջոցառման առիթով Ն.Ս.Օ.Տ.Տ. Գարեգին Ա Ամենայն Հայոց Կաթողիկոսն իր գնահատանքի ու քաջալերանքի ուղերձը հղեց բոլոր մասնակիցներին: Ուղերձում մասնավորապես ասվում է.

Ապրէ՛ք, երեխէ՛ք

Սրտի գերագոյն աստիճանի ուրախութեամբ տեղեկացայ 1700-ամեակի Յանճնախումբի Վարիչ-Տնօրէն Գերշ. Տ. Մեսրոպ Արքեպս. Աշճեանէն, որ այս երկու օրերը, 1-2 Մայիս, դուք ձեր կեանքին մէջ արժեցնում էք մեր Մայր Հայրենիքի փառակերտ հին եկեղեցիներին ուխտի գնալով, աղօթք անելով և քրտինք թափելով նրանց մաքրագարդման համար:

Ապրէ՛ք, երեխէ՛ք:

Հիանալի մի գաղափար, որին ահա շօշափելի և պերճախօս արտայայտութիւն էք տալիս շքեղ և օրինակելի հասարակարմութեամբ հանդէպ ձեր հայրերի սուրբ ժառանգութեան:

Երջանիկ եմ, որ ճիշտ էք ըմբռնում եկեղեցու իմաստը: Եկեղեցին սոսկ քարը չէ. նիւթը չէ, այլ՝ ձեր ապրումն է, ձեր մասնակցութիւնն է եկեղեցու կեանքին: Բայց քարը ունի իրեն յատուկ իմաստ, քանի նրա միջից են արտայայտուում կրօնական զգացումը, արուեստի տաղանդը:

Ապրէ՛ք, երեխէ՛ք:

Հայաստանի կերպարանափոխութիւնը մի տեսակ պայծառակերպութիւն պիտի լինի նոր սերնդով: Ժամանակին մարդիկ եղան, որ քանդեցին, աւերեցին, կեղտոտեցին, արհամարհեցին: Ահա դուք կը վերաշինէք, կը մաքրագարդէք, կը պայծառացնէք:

Ապրէ՛ք, երեխէ՛ք:

Այս երկու օրերը ձեզ համար մի տեսակ դպրոցական դասընթացք է, որի միջից հոգին է, որ խօսում է ձեզի, խօսում է ձեզի հետ, խօսում է ձեր միջոցաւ մեր ժողովրդի հետ: 1700-ամեակի պանծացման լաւագոյն և ամենէն պատուաբեր եղանակներից մէկն է այդ:

Որովհետև՝

«Եկեղեցին հայկական՝

ծննդավայրն է հոգւոյս»:

Եւ ո՞ր անձի համար ծննդավայրը քաղցրագոյն վայրը չէ:

Լծուե՛նք աշխատանքի, որպէսզի այդ ծննդավայրը դառնայ մեր բոլորիս համար կենսավայր՝ աղբիւր երջանկութեան և յաղթանակի:

ԳՍՐԵԳԻՆ Ա

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ի Մայր Աթոռ Ս. Էջմիածին

1-2 Մայիս 1999